

meynthe, den welcken het oock desghelycks is voorgehouden geweest.

Derhaluen so ben ick vanden voorghenomden broederen versocht geweest, als die ghene die konde getuygeniss geuen vanden will ende meyninghe myns voorgenoemden ghenadighen heeres des printzen, v L. met eenen brief wt haerer aller naeme te bidden ende te versoecken, dat v L. dese saecke met een christelick hertt ende ghemoet willet insien, ende den grooten noot onser armer ghemeynte die niet alleen met sware veruolginghen maer oock met velerley sieckten ende andere aenuechtinghen soo van binnen als van buyten schier onderdrucket wordt, aensiende, willet ernstelicken bedencken hoe grootelickx van noode dat het syn soude ende wat een grooten nut ende orboor alle lidmaten des lyffs Christi daer wt souden ghenieten, dat sulcx te weghe ghebracht werde, also men in Vrancryck dickmael beuonden ende gespuert heeft, daer sy in 't midden onder 't cruyce haere generaele Synoden so te Parys als te Orleans ende elders op verscheyden tyden ghehouden hebben: Ick achte broeders dat het v L. nae de wysheyt ende verstandt daer mede v God begauet heeft, dit vele beter ende grondelycker kunnet begrippen ende by v seluen ouerwegen dan ick het met eenich schryuen soude kunnen wtdrukken, wieshaluen het oock onnoodich is vele woorden hier in te gebruycken, Dewyle doch de saecke haer seluen ghenoechsaem wt-wyst, ende schier claerlicken spreekt, also dat het een yeder wt hem seluen mercken kan.

Daerom is myn ootmoedich ende vriendelick bidden aen v l. soo wt naeme vande voorghemelde broederen ende te samen oock der broederen tot Heydelberg ende Franckendal, als oock wt mynen eygen naeme als wesende een cleyn lidmaet des Heylighen Lichaems Christi Jesu, daerin wy alle te samen verbonden ende verknocht syn, Dat v L. met alle vliet ende arbeyt dese saecke beneerstigen wilt, ende v hierin met ghemeyne eendrachticheyt begeuen, seyndende wt vwe ghemeynten ettlicke dienaeren ende broederen van beyderley spraeken Duytssche ende Walssche die volmachtiget syn, om alles wat inde ghemeyne vergaderinge sal voorgedragen werden te mogen bewilligen ende besluyten euen als off v l. alle met eenander aldaer tegenwoordich waert, Ter plaetsen ende ten tyde als v l. van onsen broederen van Embden (welcke wy gebeden hebben, dat sy aengesien de gelegentheyt haerder plaetsen willen met den ghenen die van hier met eendrachtighe bewillinghe der broederen daertoe geschickt syn beraetslagen ende besluyten ouer den bequaemsten tyt ende allergelegenste plaetse) sal genoemt ende verclaert werden. De ghemeynten all hier sullen haer oock daarin met christelicke liefde ende eenicheyt begeuen, begherende van gantser herten dat het tot loff ende prys Godes ende tot opbouwinghe syner gemeynte ghedyen muege. Oock muegen v l. haer versekert houden dat Syner vorstelicken ghenaden een groot welgeuallen daeraen geschieden sal, dewyle hy doch niets inder werelt so seer en begheert als de voorderinghe der heerlicheyt Godes ende de opbouwinghe der ghemeynten, welcke hy genoech bekent hier door eene groote voorderinghe ende toeneminghe te kunnen ontfangen. Ende nademael ick ouer v l. goeden heyligen ende